

Relatório visita fiscalizaun ba Munisípiu Aileu

I. Introdusaun

Comissão de Saúde, Segurança Social e Igualdade de Género hala'ó vizita fiskalizasaun bazeia ba art. 92, art. 95, n.º 3 alínea e), kombinadu ho art. 145 n.º 3) husi Konstituisaun RDTL, no mos bazeia ba art. 35 alínea c), art. 79 alínea f) husi Rejimentu Parlamentu Nasionál.

Vizita ne'e realiza tuir autorizasaun ho despaxu Prezidente Parlamentu Nasionál datadu 08 outubru 2020, hodi realiza vizita de fiskalizasaun ba Munisípiu Aileu, inisia iha 14 to'ó 16 outubru 2020.

II. Objetivu

Objetivu husi fiskalizasaun ne'e maka atu observa, rekolla informasaun relasiona ho servisu Administrasaun Públika, Ezekusaun orsamentu no implementasaun programa anual 2020, ba iha liña ministérial sira-ne'ebé tutela iha área juridisun Komisaun F.

III. Area temática Komisaun

Konforme iha aneksu I, Deliberasaun Parlamentu Nasionál nú. 2/2018, 27 juñu, hodi konstitui Comissões Especializadas Permanentes no defini área kompetensia ba Komisaun F:

- a) Saúde;
- b) Seguransa Sosiál;

- c) Labarik sira, terseira idade no sidadaun portadores de defisiénsia;
- d) Kombatentes luta ba libertasaun nasionál;
- e) Igualdade Jéneru no la diskriminasaun.

IV. Kompozisaun Delegasaun

Membros Komisaun sira-ne'ebé kompoin iha vizita traballu ida ne'e kompostu husi:

1. Deputadu Noé da Silva Ximenes (Prezidente Komisaun)
2. Deputadu Félix da Costa (Vise-Prezidente)
3. Deputada Helena Martins Belo (Sekretária)
4. Deputada Cidalia Mesquita Ximenes (Membriu)
5. Deputada Lusía Taeki (Membriu)
6. Deputada Maria Gorumali Barreto (Membriu)
7. Deputada Veneranda Lemos (Membriu)
8. Deputadu António Maria Nobre Amaral Tilman (Membriu)
9. Deputadu Ernesto Fernandes "DUDU" (Membriu)
10. Augusta Marques (Tékніка)
11. Marta Corte Real (Analista Orsamentu)
12. Paulo da Costa Nunes (Tékniku)
13. Jornalista PN nain 1
14. Jornalista GMN 2
15. Média PN 1

V. Atividades Realizadas

1. Vizita Postu Saúde Seloí Kraik

Iha lora 14 outubru 2020, Membros Komisaun F realiza vizita fiskalizasaun ba iha Postu Saúde Seloí Kraik, hodi hala'o observasaun direta ba Postu Saúde refere. Iha vizita ne'e pessoal saúde sira informa assuntu sira hanesan:

- Postu Saúde Seloí Kraik, situada iha Suku Seloí Kraik, Munisípiu Aileu, ho rekursu humanu: Pessoal Saúde iha nain 4 kompostu husi Médiku jerál 1, Parteira 1, Asistente Enfermeira 1 no Farmasista nain 1. Postu Saúde ne'e halo atendimentu ba 4.000

habitantes, kompostu husi Aldeia 10, husi aldeia sira-ne'e, aldeia 3 maka iha asesu ba iha Sentru, tanba distansiamentu ne'ebé do'ok.

- Postu Saúde laiha pessoal seguransa, motorista no pesoál limpeza.
- Iha Postu Saúde ne'e iha de'it kama 1 hodi halo atendimentu ba inan partus sira, karik iha nain 2 maka atu partus, 1 tenki refere ba iha Sentru Saúde Aileu Vila. Inan ne'ebé maka partus iha postu ne'e ho número mensal husi 5 to'o 10 pessoas.
- Kondisaun ka espasu Postu Saúde klo'ot, laiha ventilasaun no difikulta atendimentu ba comunidade sira-ne'ebé halo tratamentu saúde.
- Patrimóniu. Iha Postu Saúde Selo Kraik, iha de'it motorizada "Mega-pro" 1 ho kondisaun ne'ebé a'at ona durante fulan 4.
- Medikamentus. Relasiona ho aimoruk laiha problema. Pesoál saúde sira sempre halo pedidu emerjénsia ho regular ba iha Sentru Saúde hodi garante ninian *stock*.
- Asesu Bee Mós. Iha postu ne'e difikuldade ne'ebé enfrenta maka laiha Bee Mós.
- Implementasaun Programas saúde sira la'o ho di'ak, hanesan programa SISCA, saúde na família, imunizasaun, nsst.

2. Vizita Sentru Saúde Aileu Vila

Depois de hala'o tiha vizita iha Postu Saúde Selo Kraik, Prezidente Komisaun ho ninian komitiva kontinua halo vizita fiskalizaun no observaun, ba iha Sentru Saúde Aileu Vila. Iha vizita ne'e, Membros Komisaun F hala'o enkontru ho Xefe Departamentu Sentru Saúde Aileu Vila, hodi esklaresa no presta informasaun balun relasiona ho servisu administrasaun no implementasaun programas saúde.

- Sentru Saúde Aileu Vila ninian área kobertura iha Suku 12, kompostu husi Aldeia 64. Fasilidade Saúde: iha Postu Saúde 4, Postu Tratamentu 4, Postu SISCA 12, *outreach* 6, no *Mobile Klínika* 4.
- Iha *outreach* ne'e hala'o tiha fatin SISCA mas la konsege to'o iha ne'eba, entaun kria fali oráriu seluk ida ba atendimentu comunidade.
- Iha *Mobile Klínika*, iha fatin ba labarik kuandu mai tuir programa SISCA, karik sira la hetan imunizasaun entaun halo fali programa ba imunizasaun no konsulta ba inan isin-rua.

- Iha facilidade sira-ne'e, Postu 4 ne'e destaka Parteiras no Médicos. Husi Postu 4 ne'e, Postu ida maka seidauk iha Médiku.
- Maioria iha Postu Saúde sira-ne'e destaka de'it maka Parteiras, Médicos, no seidauk iha Enfermeiros.
- Sentru Saúde Aileu Vila iha departamentu lubuk ida kompostu husi: Unidade Internamentu ba Observasaun, Unidade Maternidade no Unidade Laboratóriu.
- Iha programa SISCA, tanba iha suku balun maka aktividade Sentru Saúde nian la konsege kobre, estabelese fali oráriu ba suku sira ne'e hodi bele halo kobertura ba programa refere.
- Estatutu Sentru Saúde. Ami preokupa tebes ho estatutu Sentru ida-ne'e, tanba iha 2016, iha levantamentu katak atu transforma Sentru Saúde ida-ne'e ba Sentru Internamentu. Iha tinan 2008 to'o 2016, ninian estatutu hasa'e ba Sentru observaun ninian durasaun ka tempu observaun ba 24 oras. Maibé, na realidade ema sira-ne'ebé halo observaun labele haruka ba Díli ka Maubisse, no bele observa to'o 48 oras.
- Estatutu ne'ebé Sentru iha ne'e laloos, katak atu sai hanesan Sentru Saúde ka Sentru Internamentu? Entaun ho estatutu ne'ebé seidauk klaru, pasiente sira-ne'ebé baixa iha ne'e labele hetan aihan. To'o agora daudaun, Sentru la fornese hahan ba pasiente sira.
- Lençol hirak ne'ebé hetan iha 2015. To'o ohin loron lençol sira-ne'e mos a'at no laiha ona kondisaun atu uza.
- Bee Mós. Depósito Bee iha Aileu Vila ne'e maka la sufisiente hodi fornese ba Sentru Saúde no comunidade sira. Agora dependente hela ba Servisu Agua no Saneamentu-SAS, hodi halo oráriu distribuissau Bee ba comunidade no Sentru Saúde.
- Kareta Ambulánsia. Atribuisaun kareta ambulánsia multi-funsaun mai iha Sentru desde 2014, no sempre hetan avaria hodi fó impaktu ba servisu saúde.
- Fornesimentu kombustível. Pesoál Saúde sempre hetan difikuldade kona-ba apoiu kombustível ne'ebé la sufisiente (Gazoel no Gazolina), no ida-ne'e mós sai kauza ba atendimentu públiku ba 27.000 habitantes iha Suku sira.
- Muro Protesaun. Iha facilidade saúde sira, populusaun sira nian animal hakiak iha asesu ne'ebé fasil tanba laiha Muro Protesaun.
- Materiál apoiu ba servisu Administrasaun. Iha Sentru Saúde iha computador maibé ninian *printer* maka ho kondisaun ladi'ak.

- Kama sira ne'ebé existe iha Sentru Saúde ho total 18 camas.
- Sentru Saúde iha pesoál voluntária nain 8, karik iha rekrutamentu ruma iha futuru sei akumula mos pessoal hirak ne'e tanba sira iha vontade ne'ebé bo'ot hodi halo servisu maske ho voluntáriu de'it. Pessoál sira-ne'e balun hetan bolsa ba eskola iha Kediri.
- Parseiru sira-ne'ebé koopera ho Saúde maka hanesan: World Vision, PLAN, Care, UNICEF, OMS, Alola, HAI, nsst.
- Papel Servisu Saúde nian durante Estadu Emerjénsia maka fó treinamentu ba Pesoál Saúde sira kona-ba medidas atu prevene no detekta kazu Covid-19. Organiza enkontru ho Autoridade Lokál sira hanesan Xefe Suku, Xefe Aldeia, Administrador Postu no Autoridade Polísia.
- Hala'o atividade monitorizasaun iha fatin sira-ne'ebé maka estabelese ona facilidade sira no suporta sabaun.

3. Vizita Sentru Solidariedade Sosiál Munisípiu Aileu Vila

Iha vizita fiskalizasaun ne'e, Prezidente Komisaun ho ninian komitiva kontinua ba observa Servisu Administrasaun no Armazén Sentru Solidariedade Sosiál Munisípiu Aileu Vila. Delegasaun Komisaun F simu direita husi Funsionáriu no Diretór. Iha enkontru ne'e Prezidente Komisaun informa kona-ba objetivu vizita fiskalizasaun no halo introdusaun ba Membros Delegasaun.

Depois de halo sorumutu, Diretór Sentru Solidariedade Sosiál no Membros Komisaun ba halo observasaun iha Armazén (maibé armazén ne'e mamuk hela ka sasan laiha laran). Tuir informasaun ne'ebé hatoo husi responsável katak, durante Estadu Emerjénsia MSSI seidak halo distribuissau necessities básicas ba Sentru Solidariedade Munisípiu, hodi atende vítimas desastres naturais no mós apoiu sosiál sira seluk. Responsável ba servisu sosiál ne'e akresenta liu-tan katak armazén bele rai ka konserva foos to'o 1.000 sacas, maibé realidade laiha foos no sasan apoiu humanitáriu ruma iha armazén.

4. Enkontru ho Prezidente Autoridade Munisípiu Aileu

Iha vizita ne'e Membros Komisaun F simu diretamente husi Prezidente Autoridade iha ninian Gabinete hodi informa objetivu husi vizita fiskalizasaun ne'e. Hafoin hala'o tia sorumutu,

Prezidente Autoridade ho Membros Komisaun F dirije ba salaun enkontru administrasaun munisipál.

Diretór Servisu Saúde Munisipál

Kestaun hirak ne'ebé apresenta ba Komisaun durante sorumutu iha vizita fiskalيزasaun maka hanesan:

- Servisu Saúde Munisipál hala'o atividades rotina hanesan programa SISCA ho total 33 no sub-SISCA 22 iha nível munisípiu.
- Servisu Munisipál hetan mos apoiu transporte ambulánsia 2 no ambulánsia multifunsaun 4, hodi apoiu ba implementasaun programas saúde no atendimento ba populasaun. Transporte sira ne'e distribui ba Sentru Saúde 4.
- Servisu Saúde Munisipál la asesu ba orsamentu 2020 maibé asesu de'it ba orsamentu DOT ho total \$35.216.30, nune'e implementasaun ba programas saúde la la'o ho di'ak.
- Hala'o mapeamentu ba pesoál saúde hodi submete ba servisu sentráal hodi hola atensaun no konsiderasaun ba pedidu.

Diretór Sentru Solidariedade Sosiál

Kestaun hirak ne'ebé apresenta ba Komisaun durante sorumutu iha vizita fiskalيزasaun maka hanesan:

- Pesoál sira ne'ebé servisu iha Sentru solidariedade sosiál Munisípiu hamutuk 6 pessoas.
- Viatura operasionál ba Sentru solidariedade sosiál munisípiu laiha, no durante ba realizasaun atividade sosiál sira uza dei't viatura ne'ebé atribui ba Diretór Sentru Solidariedade.
- Motorizada ba Ponto Fokál iha servisu sosiál nian laiha apoiu kombustível, no mos responsável sira maka halo rasik manutensaun bainhira hetan avaria ruma.
- Orsamentu alokadu ba Sentru solidariedade sosiál munisípiu iha de'it item 3 kompostu husi *Workshop/* semináriu ho montante \$223/mês, despesas operacionais \$150/mês, no outros serviços iha \$165/mês.
- Infraestrutura. Tuir informasaun husi servisu sentráal katak sei harii edifisiu foun ba sentru solidariedade sosiál Munisípiu tinan 2021.

Diretór Terras no Propriedades

Iha enkontru ho komisaun Diretór informa asuntu hanesan tuir mai:

- Ministériu Estatal halo akordu ho Ministériu Justisa relasiona ho deskonsentrasaun administrasaun, hodi delega funsionáriu na'in 2 husi terras no propiedades no rejistu notariado.
- Funsionáriu 2 ne'e nian knaar maka halo servisu ba identifikasaun propriedade estadu nian, hasai notifikasaun okupasaun ilegal no inklui mos halo mediasaun.
- Iha servisu notariado hetan problema ba emisaun sertidaun batismu ba interesadu sira hodi hetan subsídiu ba terseira idade.
- Iha limitasaun pesoál ba iha servisu kadastrais nian, tanba oras ne'e iha de'it pessoal na'in 4 maka halo atendimentu ba populasau iha Munisípiu.
- Problema transporte no kombustível hodi hala'o atividade.
- Seidauk finaliza verifikasaun no identifikasaun na'in ba rai tanba kompañia ne'ebé hetan projetu termina ona ninian kontratu. **Husu ba Governu no Parlamentu se bele karik autoriza ministériu competente atu kontinua fali servisu ne'e.**

Diretora Servisu Edukasaun

Assuntu hirak ne'ebé maka hatoo ba Komisaun durante sorumutu iha salaun enkontru administrasaun autoridade Munisipál maka hanesan:

- Programa merenda eskolar ninian implementasaun la'o no aplika ba rejime espesial no rejime jerál.
- Edifisiu eskolar sira kuaze a'at hotu ona iha munisípiu no Postu Administrativu sira.
- Alokasaun orsamentu ba edukasaun munisipál barak liu maka iha kategoria bens no servisu no ba kategoria kapital menor laiha alokasaun.
- Liga ho servisu fiskalizaun servisu edukasaun munisipál nian iha difikuldade, tanba kondisaun ba transporte no apoiu kombustível la permite hodi halo supervizaun ba implementasaun atividades iha nível suku sira.
- Orsamentu ba pagamentu eletrisidade no telefone laiha.
- Fasilidade saneamentu no Bee mós ba iha Eskola la asesível hodi impede implementasaun programa merenda eskolar.

5. Enkontru ho Administrador Postu Administrativu Lekidoe

Iha enkontru ne'e Komisaun informa kona-ba objetivu husi vizita Komisaun nian ba Postu refere. Iha biban ne'e Administrador mos hatoo informasaun balun relasiona ho reclamantes ba subsídiu agregadu famíliar US \$200. Administrador salienta katak lista reclamantes submete ona ba ministériu kompetente ba prosesu validasaun dados no pagamentu.

6. Vizita Sentru Saúde Lekidoe

Iha vizita ne'e Xefe Sentru relata ba Komisaun kona-ba servisu Sentru Saúde Postu Administrativu Lekidoe, Munisípiu Aileu ho assuntu sira hanesan tuir mai:

- Rekursu Humanu. Pesoál Saúde iha Sentru Saúde: iha Médiku 2, Enfermeiru 3, Parteira 2, Promotor ba informasaun Saúde 1, assistente 1 no voluntáriu 1.
- Iha lina koordinasau no servisu ekipa ne'ebé di'ak, maske ho rekursu humanu ne'ebé ituan.
- Ambiente Sentru Saúde ne'ebé saúdavel no kondisaun ne'ebé diak.
- Área kobertura ba Suku 7 ho total populasaun mais de 7.000 habitantes.
- Infraestrutura ladiak no difisil tebes bainhira atu halao programa SISCAs ho motorizada.
- Fasilidade saúde, iha Postu Saúde 2.
- Preokupasaun kona-ba sira-ne'ebé remata ona eskola sekundáriu asesu ba UNTL iha fakuldade Medisina, sempre la pasa ka admitidu, nune'e labele prienxe ba vaga pesoál saúde ne'ebé iha Postu Administrativu Lekidoe.
- Iha difikuldade kona-ba kombustível hodi halo atendimentu ba comunidade ne'ebé hela dook husi fasilidade saúde sira.
- Equipamentos ne'ebé presiza maka hanesan : *tensimeter, termometer, thermoscan no dopler*.
- Transporte: ambulánsia multi-funsaun 1, motorizada *Honda Supra* 3 ho kondisaun a'at, *Honda Verza* 2 ho kondisaun di'ak, *Mega Pro* 4 ho kondisaun dia .
- Alokasaun fundu Covid-19 ho total \$ 4.540 no ninian ezekusaun atinji ona 100%.

7. Vizita Sentru Saúde Ambulatóriu Remexio

Komisaun kontinua hala'o vizita fiskalizasaun ba iha Sentru Saúde Remexiu hodi halo observasaun no enkontru ho profissionais saúde ne'ebé presta servisu iha sentru refere. Iha okaziaun ne'e Xefe Sentru Saúde informa ba Delegasaun kona-ba asuntu sira hanesan tuir mai:

- Sentru Saúde Remexiu hanesan mós sentru saúde ambulatoriu, signifika pesoál saúde halo atendimentu direta ba comunidade iha suku sira, no lori mai iha sentru saúde hodi observaun durante oras 2 de'it no kontinua refere ba Hospital Nasionál Guidu Valadares no Hospital Referral Maubisse. Maioria paciente la refere ba Hospital Referral Maubisse tanba distansia do'ok.
- Rekursu umanu. Iha sentru saúde Remexiu iha profesionais saúde ne'ebé kompostu husi Médicos jerál 4, Enfermeiros 7, Parteira 4, Farmasista 2, Tekniku Dentária 1, Analista Laboratóriu 2, Pesoál Seguransa 2, Pesoál Limpeza 1, Ofisiál Malária 1, Assistente Malária 1 no Coordenador nutrisaun 1.
- Área kobertura saúde iha postu administrativu Remexiu iha suku 8. Fasilidade saúde: suku 4 iha Postu Saúde no suku 3 iha Postu tratamentu.
- Postu Saúde 4 ne'ebé maka seidaun iha Médiku (suku Fatuletu, iha de'it maka Parteira 1 no Farmasista 1; suku Faturasa iha Enfermeira 1; suku Fada Bloko iha Enfermeiru 2 no suku Maumeta iha Parteira 1 no Assistente Malária 1).
- Postu tratamentu iha suku 3 ne'ebé estabesele iha tinan 2014 maka hanesan: suku Bera Liurai ne'ebé iha Médiku 1; suku Liurai ne'ebé iha Médiku 1 no suku Hauto ne'ebé iha Médiku 1.
- Transporte. Iha Sentru Saúde ambulatoriu ne'e iha ambulánsia maternidade 1 hetan apoiu husi Austrália no ninian kondisaun ladi'ak. Iha mos motorizada ba pesoál saúde sira ne'ebe uza ona liu tinan 7, laiha manutensaun no mos laiha apoiu kombustível. Aleinde ne'e, iha mós pesoál saúde balun uza sira nian motorizada rasik hodi hala'o servisu.
- Dados kona-ba moras ne'ebé a'as iha Sentru Saúde ambulatoriu Remexiu maka diareia (bainhira iha tempu udan) no moras respiratóriu agudu ka ISPA (ne'ebé maioria akontese iha tempu bailoron). Aleinde ne'e rejista mos moras diabetes no hipertensaun.
- Moras Tuberkulose. Ba paciente sira ne'ebé hetan moras ne'e sei fó aimoruk no akompaña paciente sira ninian tratamentu to'o faze rekupersaun.
- Liga ho mal-nutrisaun rejista paciente na'in 2 no paciente na'in 1 maka mate. Pesoál saúde sira fahe nafatin informasaun ba comunidade kona-ba nutrisaun, no mos halo promosaun saúde kona-ba oinsa prepara hahan ne'ebé nutritivu ho di'ak ba sira nian família.

VI. Konkluziun

Bazeia ba vizita fiskalizaun no observaun ba Serviços Ministeriais iha Munisípiu Aileu, Komisaun halo konkluziun hanesan tuir mai:

Área Saúde

1. Postu Saúde Selo Kra'ik. Iha Postu ida ne'e seidak iha espasu suficiente hodi hala'o atendimentu saúde ba iha comunidade, menus pesoál saúde, laiha equipamentos médicos no residénsia ba pesoál saúde.
2. Sentru Saúde Aileu Vila sei falta: pesoál saúde, bee mós, equipamentos médicos, transporte, kombustível no equipamentos iha sala baixa/internamentu ba pasiente sira. Seidak iha klareza ba definisaun Estatutu Sentru Saúde Aileu Vila.
3. Sentru Saúde- Postu Administrativu Lekidoe sei falta profissionais saúde, equipamentos médicos, transporte, apoiu kombustível ba pesoál saúde sira ne'ebé uza motorizada, no comunidade sira nian assesu ba facilidade saúde ne'ebé ho distánsia dook.
4. Presiza halo rehabilitasaun ba edifísiu Sentru Saúde Remexio.
5. Presiza halo manutensaun ba transporte ne'ebé iha Sentru Saúde Remexio.
6. Iha pesoál saúde ne'ebé hala'o servisu ho voluntáriu iha facilidade saúde sira, maske sem vensimentu ka kontratu maibé iha motivasaun ne'ebé diak hodi fó apoiu ba servisu iha área saúde.

Servisu Sosiál

1. Durante implementasaun orsamentu DOT laiha apoiu sosiál ba comunidade sira ne'ebé afetadu husi desastres naturais, ba ema vulnerável sira, no mos apoiu sosiál sira seluk.
2. Menus pesoál iha sentru solidariedade sosiál hodi hala'o servisu administrasaun no atendimentu ba comunidade.
3. Laiha viatura operasionál hodi apoiu ba servisu sosiál. Difikuldade ba apoiu kombustível no manutensaun ba viatura Diretór Sentru Solidariedade ne'ebé maka suporta atividades iha Munisípiu refere.

VII. Rekomendasaun

Ministériu Saúde

1. Solisita ba Ministériu atu aumenta númeru profissionais saúde iha facilidade Saúde dezde Postu Saúde to'o Sentru Saúde iha Munisípiu Aileu.
2. Presiza fó atensaun ba pesoál ne'ebé hala'o servisu voluntáriu iha facilidade saúde sira.
3. Asegura manutensaun regular ba transporte (ambulánsia no motorizada sira), inklui apoiu kombustível.
4. Halo inspeksaun regular no apoiu equipamentos médicos ba facilidade saúde sira.
5. Konstrui Postu Saúde iha suku sira ne'ebé difisil atu assessu ba Sentru ka Postu Saúde sira ne'ebé estabelese ona.
6. Presiza halo destakamentu proporsional ba rekursu humanu hanesan pessoal farmasista iha facilidade saúde sira.

Ministériu Solidariedade Sosiál no Inkluzsaun

1. Assegura apoiu umanitária ba vítimas desastres naturais no apoiu sosiál sira seluk.
2. Hadi'ak liña komunikaun, koordensaun no organizaun servisu iha Sentru Solidariedade Sosiál Munisípiu Aileu.

VIII. Aprovasaun Relatóriu

Relatóriu fiskalizaun ne'e hetan apresiasaun no aprovasaun iha loron 14 janeiru 2020, ho votos a favor 6, kontra 0 no abstensaun 1.

Relatóra,

Prezidente Komisaun,

Helena Martins Belo

Noé da Silva Ximenes "Buka Tuir"